

## Utvikling



*Bilete 1: 'Discovery' har framleis igjen nokre dagar på trea før dei kan haustast. Grunnfargen bør være kremgul om den skal omsetjast som konsumfrukt.*

Innhaustinga har starta for tidlege eple- og plommesortar. Det er i første rekkje tidlege eplesortar som er lite aktuelle for økologisk som 'Geneva Early' og 'Julyred'. Dei noko økovenlege sortane 'Nanna' og 'Idunn' kan også nærme seg hausteklare. NLR gjennomfører haustetidsregistrering i dei ulike fruktdistrikta og kjem med anbefalingar, så ein får følge med lokalt.



*Bilete 2: 'Eden' er i rute modningsmessig.*

Det er våte forhold både i vest og aust, men ein får prøve å gjere unna innhaustinga på best mogleg måte.

## Ugras

Sortar som nærmar seg hausting kan ein vente med ugrasfresing til etter at epla er plukka. Når epla har 2-3 veker igjen til hausting heng dei laust og ristingar frå ugrasfresing kan være for mykje. Ta opp igjen fresinga når avlinga er hausta.

## Kjernefrukt



Sjå plantevernplanen, seksjon økologisk, for dosering etc. Nyttedyra våre som mariehøner og gulløyer vil også redusere insektskader.

Kva som er hovudproblemet kan ein finne ut av ved å tilfeldig hauste og analysere 100 kart. Gå som i blinde i hagen og finn ei grein og plukk den rein, gå så vidare til ei ny, så ein til slutt har 100 kart. Prøv å finne ut kvar som er skadeårsak med å bruke oppslagsverk eller [plantevernleksikonet](#).

*Bilete 3: frukttremidd kan ein sjå no. Blada blir brune og ein kan såvidt skimte sommeregga som ligg på blada.*



*Bilete 4: grøn eplebladlus er tilbake i eplefelta for å legge vinteregg. Det er få tiltak som er aktuelle så nær innhausting, men om angrepet er lite kan ein klyppe bort dei verste lusetoppene.*

## Få bort rotnande frukter

Når skade av insekt eller sopp heng på trea, vil det ofte smitte over til friske naboepler. Har ein moglegheit til å ta nokre «rydderundar» å ta bort monilia-eple no i tida framover vil det vere bra for frukta som heng igjen. Ha det som rutine at haustarane fjernar rotnande frukt på første runde.

## Lysskjæring

I moderne hagar skal ein helst unngå for mykje lysskjæring. Dette sidan det lett kan bli ettervekst utover hausten. Vi har god vegetativ vekst og mykje lauv i mange felt, så ein må vurdere dette tiltaket likevel i år. Når trea er for tette må ein fjerne greiner og blad for å få god nok farge på epla.

## Bladgjødsling



Det er viktig med kart/bladgjødsling med kalsium. Enkelte sortar får lett mangelsjukdommen «prikksjuka» om det blir for lite kalsium fram mot hausting. Discovery er lite utsett, medan i 'Aroma' er dette tiltaket svært viktig.

Sprøyt ut ei blanding med 500 g/daa kalsiumklorid og 100 ml/daa Aminosol PS (plantebasert). Gjer dette kvar 7.-10. dag fram mot hausting.

*Bilete 5: prikksjuka er mangel på kalsium. Det er i år meir enn vanleg med prikksjuka, truleg grunna den tørre forsommaren. Dette Aromæplet blir ikkje jus eingong og kjem til å ramle av treet før hausting.*